

天方至聖實錄

天方至聖寶錄卷之三十

讚頌碑記序說

御製至聖百字讚

明太祖高皇帝敕建禮拜寺于金陵御製至
聖百字讚曰乾坤初始天籙注名傳教大聖
降生西域授受天經三十部冊普化衆生億
兆君師萬聖領袖協助天運保庇國民五時
祈祐默祝太平存心真主加志窮民拯抹患
難洞徹幽冥超拔靈魂脫離罪業仁覆天下

道冠古今降邪歸一敎名清真穆罕默德至

貴聖人

洪武元年

勅諭賽亦的哈馬魯丁護持文

皇帝勅諭賽亦的哈馬魯丁護持朕惟人心
能好善者必能敬天事上勸率善類陰翊皇
度導化羣迷故以天錫福享有無窮愛爾賽
亦的哈馬魯丁早從穆罕默德之敎薰志清
修導引善類又能敬天事上益効忠誠見茲
善行良可嘉焉今特賜爾勅修護持所在官

員軍民人等一應毋得侮慢敢有故違朕命
侮慢欺凌者以罪罪之故諭

永樂三年三月日

武宗皇帝評

武宗皇帝評論諸教謂侍臣曰儒者之學雖
可以開物成務而不足以窮神知化佛老之
學似類窮神知化而不能復命皈真蓋諸教
之道皆各執一偏惟清真認主之教深原于
更不偏正理此所以垂教萬世與天壤久也

勅回回太師文

皇帝勅曰朕聞君子之道行是爲萬幸君子之道不行是爲不幸非道不行也乃是君子之不才至道或滯於一時吾中國之文始八卦以代結繩而編簡至於方冊流傳大聖人之言莫不備載萬物性情造化無所不該焉洪武初大將入都得圖籍文皆可考惟秘藏之書數十百冊乃乾方先聖之書我中國無解其文者聞爾某道學本宗深通其理命譯之今數月所譯之經知上下察幽微其測天

之道甚足稱詳於藏乾方之秘書非爾安能
明於中國爾非書安能名不朽之智人特命
爾某爲翰林編修汝其欽哉

洪武十五年

費典赤瞻思丁封咸陽王回回人別菴伯爾
之裔其國言費典赤猶華言貴族也太祖西
征瞻思丁率千騎以文豹曰鶻迎降命八宿
衛從征伐以費典赤呼之而不名至元十六
年卒年六十九贈守仁佐運安遠濟美功臣
太師開府儀同三司上柱國咸陽王諡忠惠

予五人長納達剌丁至元二十九年以疾卒
贈推誠佐理協德功臣太師開府儀同三司
上柱國中書左丞相封延安王子十二人長
伯顏中書平章政事薨年五十九伯顏深略
善斷將二十萬衆從征若將一人諸帥仰之
若神明畢事還朝歸裝惟衣被而已未嘗言
功也特贈宣忠佐命開濟功臣太師開府儀
同三司追封淮安王諡忠武至正四年加贈
宣忠佐命開濟翊戴功臣追封淮王

出元史

饗典赤始祖別菴伯爾卽西方真教大聖穆罕默德也生而聖德膚智不可言能使草木禽獸來去行止饗氏實出其後元太德間祖孫父子世歷將相之位而上亦特重之

永樂三年

太監鄭和勅書

回回天文書序

序曰皇上奉天明命撫臨彝華車書大同人文宣朗爰自洪武初大將軍平元都收其圖籍經傳子史凡若干萬卷悉上進京師藏之

書府萬幾之暇卽召儒臣進講以資治道其
間西城書數百冊言殊字異無能知者十五
年秋九月癸亥上御奉天門召翰林臣李紉
臣吳伯宗面諭之曰天道幽微垂象以示人
人君體天行道乃成治功古之帝王仰觀天
文俯察地理以修人事育萬物由是文籍以
興義倫攸叙邇來西域陰陽家推測天象至
爲精密有驗其緯度之法又中國書之所未
備此其有關於天人甚人宜譯其書以時披

闕朕幾觀象可以省躬修德思患預防順天
心立民命焉遂召欽天監靈臺郎臣海達見
臣阿答兀丁回回大師臣馬沙亦黑臣馬哈
麻等咸至于庭出所藏書擇其言天文陰陽
歷象者次第譯之且命之曰爾西域人素習
本音兼通華語其口以授儒爾儒譯其義緝
成文焉惟直述毋藻繪毋忽臣等奉命惟謹
開局於右順門之右相與切摩達厥本指不
敢有毫髮增損明年二月天文書譯既繕

以進有旨命臣伯宗爲序臣聞伏羲畫八卦
唐堯欽歷象大舜齊七政神禹叙九疇歷代
相傳載籍益備其言天地之變化陰陽之闢
闔日月星辰之運行寒暑晝夜之代序與夫
人事吉凶物理消長微妙弘衍矣今觀西域
天文書與中國所傳殊途同歸則知至理精
微之妙充塞宇宙豈以東西面有間乎恭惟
皇上心與天通學稽古訓一言一動森若神
明在上凡禮樂刑政陽舒陰歛皆法天而行

期於七曜順度而陽時若以致隆乎之治皇
上敬天勤民卽伏羲堯舜禹之用心也經傳
所載天人感應之理存於方寸靈矣今又譯
成此書常留府覽兢兢戒愼純亦不已若是
其至哉是書選出天方聖裔在元世百有餘
年晦而弗顯今遇聖明表而爲中國之用備
一家之言何其幸也聖心期焉大公一視無
間超軼前代遠矣列而存之與中國聖賢之
書并傳并用豈惟有補於當今亦有功於萬

世云 洪武十六年五月辛亥翰林檢討臣
吳伯宗序

同回天文經序曰天理無象其生人也恩厚
無窮人之感恩而報天也心亦罔極然而大
道在天地間茫昧無聞必有聰明睿智聖人
者出心得神會斯道之妙立教於當世後之
賢者接踵相承又得上古聖人所傳之妙以
垂教于來世也

聖人穆罕默德及後賢輩出有功于大道者

昭然可考達濶識牙耳大賢者在闡揚至理
作爲此書極其精妙後人恪守尊崇縱有明
智不能加規而過矩也 洪武十六年五月
辛亥欽天監回回太師馬沙亦黑謹序

勅建清真寺碑記

西安府

竊聞俟百世而不惑者道也曠百世而相感
者心也惟聖人心一面道同斯百世相感而
不惑是故四海之內皆有聖人出所謂聖人
者心同道同是也西域聖人穆罕默德生孔

子之後居天方之國其去中國聖人之世之
地不知其幾也譯語相殊而道合符節者何
也其心一故道同也昔人有言千聖一心萬
言一理信矣但世遠人古經書猶存得於傳
國者乃知西城聖人生而神靈知天地化生
之理通幽明死生之說如沐浴以潔身寡慾
以養心齋戒以忍性去惡遷善而爲修己之
要至誠不欺而爲感物之本婚姻則爲之相
助死喪則爲之相送以至大而綱常倫理小

而起居食息之類罔不有道罔不立教罔不
畏天也節目雖繁約之以會其全大事以化
生萬物之天爲主事天之道可以一言而盡
不越乎吾心之敬而已矣始與堯之欽若昊
天湯之聖敬日躋文之昭事上帝孔子之獲
罪於天無所禱此其相同之大畧也所謂百
世猶感而不惑者足徵也聖道雖同但行於
西域而中國未聞焉及隋開皇中其教遂入
於中華流行激激於天下至於我朝天寶陞

下國西域聖人之道有同於中國聖人之道
而立教本於正遂命工部營工官羅天爵董
理匠役創建其寺以處其衆而主其教者擺
都而的也其人頗通經書蓋將統領羣衆奉
崇聖教隨時禮拜以敬天而祝延聖壽之有
地矣是工起於元年三月吉日成於本年八
月二十日的等恐世遠遺忘無所考證遂立
碑爲記以載其事焉 天寶元年壬午仲秋
賜進士及第戶部員外兼侍御史王鉉撰

明倫彙編 家範典 重修碑記

閩中

命夫天化生萬物之主也人之事天者所以
報其化生之德惟恐獲罪於天也惟聖人踐
形惟肖而能善事乎天衆人奉崇聖人之教
以盡事天之道者也事天之道維何敬而已
矣禮拜者所以將其敬也而寺也者禮拜之
所敬天之地也履其地將其敬斯可以語事
天之道矣是道也西域聖人之道也其詳載
於舊碑予不復贊但考其寺之顛末其初創

立於唐之天寶元年三月工部差督工官羅
天官監造名爲清真寺宋靖康二年四月差
知縣僉事阿計刺督工重修及元至正二年
四月馬廉伯自備資財竭力重修至延佑二
年三月復差平章政事賽典赤督工重修奏
請勅賜清真寺至成化二年四月長安人馬
斌督工重修成化十八年八月奏請改寺名
爲勅賜清修寺至今將幾百年殿宇門舍頽
塌吾人禮拜者莫能容嘉靖元年四月吉日

督工人馬清與本寺掌教烏宗望等督同教
中耆老採材集工大啟棟宇府官孫世昌孫
世觀與勅賜飛魚服秦府承奉正鳳岡張沂
公請察王殿下卽命賜名并給磚瓦物料克
濟廼事由是規模壯麗巍峩崇新非惟吾人
禮拜敬天者得其所而振揚聖教於不息始
將祝延聖壽於悠久祈保皇圖無疆者在此
也是工告成敎人馬清等葢亭立碑謁予求
記以載其事予弗敢辭遂爲之記云

嘉靖

五年丙戌仲秋國子監李時榮撰

勅建淨覺二寺碑記

應天府

西域教門精微韞奧宏博廣衍自君臣父子夫婦昆弟朋友之倫以至天文醫卜農圃小
道之術靡不該存靡不與中國情俗相彷彿
蓋其國土居崑崙之中央故其人性秉中和
不涉乖畸我太祖高皇帝開基定鼎亦卜刺
金可馬魯丁等內附特蒙恩渥垂澤至今但
勅建禮拜淨覺二寺之由無從考證及睹各

姓勅命廼知洪武二十一年有亦卜刺金可
馬魯丁等原係西域魯密國人爲征金山開
元地面遂從金山境內隨宋國公歸附中華
欽蒙高帝喜其賓服欽賞紵絲銀鈔等物着
落禮部給與腳力前往永平府搬取家小赴
京居住因而勅建二寺安扎將可馬魯丁等
五戶分在望月樓淨覺寺居住子孫習學真
經焚修香火祝延聖壽寄籍江寧縣優免差
役永樂三年二月內欽取四戶上京着在四

譯館學習子孫至今優免差役見存九戶在
此習學奉教祝延不缺節奉禮部劄付事理
猶歟休哉高帝聰明神武非其教實有可遵
果不謬於中國先王之道惡能與居與處免
役免徭且布疋鈔錠之類頒紵絲靴襖之屨
給若是則淨覺禮拜二寺之基洵非淫祠可
比市廛之處易侵易越卽尺土寸楹皆高帝
神靈所憑依矣今幸亦卜剌金等子孫果能
世守焚修不缺瞻禮殿庭者睹金鋪而生嚴

畏之心仰雕薨而肅敬恭之度則茲寺也因
宜與國祚綿延於億萬斯年乎今遇重加修
葺各姓祈置碑勒石以垂不朽而余敬爲之
記弘治五年壬子秋九月吳郡王鏊謨

勅太監鄭和重建禮拜寺爾以所造龍船乃
差內官高定住進來果造得平穩輕妙足見
爾忠敬之心朕甚嘉悅就賞賜爾物件付與
高定住將來酬爾美意仍於南京天財庫支
鈔十萬貫與爾爲下番之費其西洋諸番國

事皆付托於爾惟爾心腹智識老成舊人以
副朕委任之重爾宜慎之得爾所奏南京城
內三山街禮拜寺被焚爾因祈保下番錢糧
人船欲要重新蓋造此爾尊敬之心何可忘
哉爾爲朝廷遠使旣以發心豈廢僞願恐爾
所用人匠及材料等項不敷臨期悞爾工程
可於南京內官監或工部支取應用乃可完
備以候風信開船故勅
宣德五年七月二
十有六日

天方聖教序

序曰中國自漢唐而下世俗有三教之名其來舊矣不知未有三教之先大西天方國之教爲最真也粵稽盤古氏開闢於西域而崑崙爲開闢之祖山天方居崑崙之陽先得天地中和正脉故其國王聖賢相承專事化生萬物之主率臣民而敬禮之純不類于虛無寂滅者其古初立教之源可謂既清且真矣易曰帝出乎震詩云上天之載無聲無臭豈

不若合符節乎迨至世運遞降聖遠言湮南
北朝時東土西陲漫漶于二氏已極乃篤生
大聖穆罕默德作君作師維持風化神靈大
德拔萃于前聖者不可悉數西域諸王臣服
而信從之共上尊號爲脂昂伯爾隋文帝慕
其風遣使至大西天求其經典開皇七年聖
命其臣塞爾帝幹歌士等貢奉天經三十冊
傳入中國由南海達廣首建懷聖寺遂遍于
天下此一統志隋書殊域志周咨錄等書爲

可據也經文雖多原其大旨無非欲人體認
本來云邪從正忠君孝親敦篤倫常而已非
有異于吾儒也以言乎提覺人心則集前聖
成規日拜五次是攝心于時矣每至阿濟納
亢牛婁鬼日赴寺大瞻禮徵七日來復之義
是攝心于日矣每歲齋戒一月鷄鳴而食至
暮後星始燦而開竟日不食渴不飲以消三
毒五濁之愆是攝心于月矣且日給糗糧更
散天課無論君民各照定例施濟貧乏以故

盜賊不生公庭無訟史稱極樂世界焉遵其
教者雖適殊域傳子孫而不易使非至誠無
息烏能悠久成物如此哉 錢塘葯園丁鵬
撰

天序賦

天方朝堂賦畧曰夫朝堂者肇基于開闢復
創于中古廟寶玉而爲庭檠雜香以爲土華
榱丹陸賁天下之偉觀香棟金簷誠古今之
勝槩深宏淵靜崇巍高堅鳥飛飛而空過纖

垢不避日爛爛而中懸層欄無影慧識承天之聖智足見丕世之神功垂雲霓漢揭露飛霞齊三光而示宇宙會萬國而朝中齋迴中海之競流拒昆崙之險阻洵天地秀靈之所鍾舉八極而拱向也

清真教考序

鍾璽

清真教考者考其教之源流本末以教天下萬世者也而其教始於天房天房之教始於人祖阿丹阿丹生而神聖與天地相叅故能

合天入之道以事造化天地萬物之主嗣後
代有聖人相與繼述隋開皇時至聖穆罕默
德出而道愈昭明矣穆罕默德命立於未有
天地萬物之先挺生於千萬聖人之後其德
化靈異視前聖尤爲廻絕而爲古今特出之
一人至其降生天房則以地當天地之中央
也誌云西域諸國當崑崙之陽於諸方爲得
風氣之正故異人多自西域出斯人其殆有
所確見而云然乎然猶未知天房之何以名

也開闢時其房名愷而白者自天而降故國
以天房號焉房自天降亦以地當天地之中
也惟其中故萬國之建立寺宇以拜造化天
地萬物之主者惟天房是向焉而禮拜之義
蘊何在乎拜主則塵緣盡却而生人之本性
見矣本性見而天運不息之機與一切幽明
兼備之理莫不於拜跪起止之開而俱見之
拜主則物我皆忘而身心之私妄泯矣私妄
泯而忠孝廉節之事與一切盡已盡物之功

莫不於人事主之時而思盡之天一禮拜
而其義蘊色舉之廣大如此則其事顧不重
哉而其事則詳於阿丹諸聖至聖穆罕默德
之經然經之所載實在不止此者言理則舉
無極以前太極既判以及人之所以象天地
與象一十八千世界之故深切而著明之言
事則舉真主所以造化天地造化人神萬物
以及古今賢聖作則於天下之事歷歷而詳
述之言物則舉天以上之所有地以下之所

有以及宇宙間風火水土胎卵化濕之物莫
不備悉而記載之後人稽其經傳卽白首不
能盡也若誌云歷法精詳不過傳中片言隻
字而已豈足盡吾教經學之萬一哉夫以如
是精微宏博之學自天房始則天房誠大道
從出之方至聖叢生之地而誌云國產麟鳳
獅寶又豈足在齒頰間哉雖然麟鳳獅寶天
下不經見之物也而天房諸國所在多有又
足見聖人有道之祥不絕於億萬斯年較之

鳳儀獸舞白魚躍舟瑞僅一時者爲獨巨終
古而常存也且其祥實不止此誌云風俗醇
美民不犯法則聖道入人之深而祥見于政
濟民服也輕財好義恤孤賑寡則聖人之流
風善政而祥見於民日遷善而不知也回鶻
諸國悉遵其教則聖道之足爲祖述而祥見
於萬邦爲憲也然要非天房神聖考其道之
源流本末以敎天下萬世又烏能有此禎祥
盛事也哉而當日西遊之名公鉅卿不能取

其至理經學一表彰之第多爲頌說以形其
西方極樂世界焉予故採蝨數語使天下達
者知清真一教獨高出諸家之上至其理之
精深道之正大又當據其經傳與有志者相
求於無盡焉

崇禎甲戌北海張忻靜之氏謨

群書彙輯釋疑跋

錄舊

是集也余於羣書中偶見而偶錄之披覽之
下遂覺天房諸國勝境儼在目前雖然有言

之能及者焉有言之未能及者焉有言之所
及而無可疑者焉有言之所及猶必俟申明
之而始知其所以然者焉若所云風俗之純
物產之異寺宇之美人情之誠樸氣候之中
和以及夫諸國遵教之廣遠至聖神靈之迥
異教規之崇正而黜邪皆其言之能及而無
可疑者也至道之所以精所以微則未有能
言者吾茲且不言其所未言第卽其言之所
及而必俟申明者一言之誌云其教專以事

天爲本而無像無像誠是也第以爲天則非也蓋所事者宰乎天地萬物之主惟主故無像也若曰天天卽有像矣有像者皆真主之所造吾教事主之外凡主一切所造之物俱不事焉故曰事主非事天也作此誌者或以萬物莫尊於天故以天之名稱主非其天卽主也閱者於事天拜天等語俱當以天字作主字觀慎勿作天字觀也誌云國人遵教雖適殊域傳子孫累世不敢易蓋言其守教之

端也而實與私立其教而端守者不同蓋諸
教皆起於人物充繁之後教立於後者真僞
難分守之可也不守之亦可也惟吾教傳自
人祖阿丹聖人在諸教未立之先阿丹初生
凡一切行止語默皆真主之所命也阿丹以
真主之所命教其子孫歷代相傳以至於今
是吾人之教依然人祖之教依然真主之所
命也惟教本主命故適殊域傳子孫累世不
敢易也誌云國王穆罕默德設其經三十本

凡六千六百餘段又云授受天經三十部冊
誠三十本也但其經非穆罕默德之所自設
亦非受之於前聖者也蓋穆罕默德爲真主
所篤降較諸往聖爲獨隆主之愛之者重故
所示之者深是經殆真主所示穆罕默德之
言而穆罕默德集之爲經以播之衆人者也
冊僅三十而不繁自包總乎前聖億萬之經
其篇六千而有奇皆詳闡乎幽明化育之微
一捧讀之不獨此生倫常之理有以知其備

悉卽吾人未生以前旣去以後之境燦若日
星不獨斯世萬有之機有以洞其淵源卽世
界未立以前旣盡以後之事燎如指掌經言
固若斯之詳且晰也緣其故皆主之厚至聖
以示之而因以及乎吾者也讀其經又安得
不因至聖之教我衆人而益專事其主也哉
而其事主之事則在五時朝拜歲齋一月以
及朝天房敦堯紀廣施濟無一事不遵主而
行無一念不歸之於主而後爲事主之至而

究此數事之由來又莫非主之諄諄昭示於
經以命其行者也至其齋拜等事之精義則
非可一言盡矣凡此皆余因誌所言及而特
爲申明之者也至其道之所以爲道則語焉
而不精說焉而不詳卽余日服習其中亦不
能以言言之也又何怪乎作誌者之不能出
一言以道之也哉雖然道不可言而教則可
言教貴得其原事主而無所岐則得其原而
不至入於迷教貴得其全事主以盡其倫則

出乎塵而更不流於虛然要之事主與盡倫
二者合之而無容合亦分之而無可分也心
乎主而事君自不敢不忠心乎主而事親自
不敢不孝以至視聽言動之間自不至無所
持循而或入於非禮也服其教者惟心乎其
主而已心乎主而教自得其真矣故清真一
教真於事主而不岐也尤真於事主而無像
真於世守之不敢易也尤真於傳自人祖而
得其原真於主示之經可據也尤真於事主

以及盡倫之得其全凡此皆教之可言者也
至其道之所以爲道仍未可以易言也

崇禎丙子歲仲秋吉 賜進士出身大中

夫奉敕督理糧儲漕務浙江布政使司右叅
政詹應鵬撰

清真教說

清真教乃開闢來聖聖相承以至於今日者
也蓋未有天地萬物之先惟有止一獨尊之
真主運無極而開衆妙之門用太極而造天

地萬有之形天地既成萬物具備始造人祖
阿丹於天方國天方處天地四極之中央故
人祖肇生於此維時真主敕命阿丹代己立
極首闡認主之道次建綱常之儀而立教焉
于是大道日行子孫相習無敢少易迨後人
物充繁漸達四方人滿東土而其教少失矣
然異說猶未起也故堯舜三代之時去古未
遠其于阿丹認主之道猶聞未有仙佛諸家
之異說也秦漢以後人之各循己私而立異

說者遂多故三教九流諸子百家紛然雜出
以眩斯人而本原之論渺不可知矣惟我天
方得衆聖真傳道統未絕更得至聖穆罕默
德所述真主之明命最詳故其教至清至真
獨得其正然非徒取其名而無實之可據者
也以言其主則有主之清真無所始也而自
不落于空無無所終也而更不拘於方位不
受陰陽而超然自在毫無干染而纖微自
此主之清也永遠常存而不似萬物至尊獨

一而靡所與同天地至大巨細莫不任其掌
管人神至廣貴賤莫不聽其死生此主之真
也以言其教則有教之清真教本主聖而不
似諸家之自立道合天人而非若異說之偏
枯聖與聖相傳而無所用其聰明人與人相
習而不敢私其臆見此教之清也自天上以
及地下而尊教者不別仙凡自開闢以至今
日而服教者無論親疎至其向背各異則所
以證其先大之自取迷悟有分則所以辨諸

身後之升沉此教之真也以言其人則有人
之清真異端邪說不能惑其志功名富貴不
得亂其衷身寄浮生而來去不滯躬居塵世
而一心常靜此人之清也心惟一主而二念
不立行惟聖訓而怠忽不生孝悌忠信之事
本于主命而奉行惟謹禮義廉恥之端出乎
經傳而佩服益深此人之真也夫主與教與
人皆有清真之可據故名曰清真教而復取
名回回何也蓋塵世乃生人之客寓幻途非

久處之家鄉故心懷常住不妄本原身雖在世心實回焉及功成行滿復命歸真名雖注世身亦回焉不特此也無極包羅衆妙純清無染是爲萬靈至大之綱太極包羅衆象理氣兼該是爲萬形至大之綱清真正人遵真主之明命履至聖之真傳則身回太極之清性回無極之妙成全正果克登天闕而得真主無疆之賜此取名回回之義也至其下學上達之功則莫詳于真主所降於群聖之經

經之所載上窮造化之玄機中間人極之妙
旨下究物理之異同義蘊精深無可窮極而
其教人入道之首務則莫大乎認識造化理
地人神萬物之真主認主之憑則莫大乎拜
主而其拜則有制焉有義焉其制維何以七
天之禮合爲一拜之儀其中有主制十聖承
禮十二聖行二十有八體天翰之常轉包日
月之運行括五行之深義總萬彙之全功此
拜之制也其義維何求恕己身之罪業默祝

君上之太平思親恩而感師訓念友誼以及
群生此拜之義也夫一禮拜而其義之包廣
如此則其上達之功又未可以言罄也較之
諸家來不知其所始去不知其所終或以身
世爲榮或以空無爲本者爲何如哉所望於
覽者明心膺而大眼界超俗見而掃異說叅
來去之跡究歸原之本庶乎得清真之正道
也已

金陵劉三傑漢英父識

回回說

清真教人天方本稱穆民穆士蓋謂從穆罕
默德聖人之教者也而此地稱之爲回回不
知其從何起意蓋吾道之自西而東也始于
隋唐經回紇國來回紇乃中國之邊譯亦天
方之邊譯也行天方之教教類相似則以音
人亦稱回紇至宋元天方學人大至視回紇
二字無謂而改爲回回聲音相近而義理頗
深沿至於今不可知也或曰回者邪也稱名

不美吾人不當自居其稱此舉一廢百之說也夫回之一字訓義不同其說如訓避訓返訓迴轉環繞避則避世避色返則返本還原迴轉環繞則包括周徧皆美義也稱名亦不其人如顏回方回古之大賢也李回褚彥回古之名宦也皆未常以爲不美徐詣曰渾天之氣天地相成天周地外陰陽二氣回轉其中也則其義理又非淺學所能曉也刀筆家僞加大旁古今所無則行怪者也而有司

不治其亂知之而不治與不知而不治殊其
得罪於古聖先賢多矣天方寔宇述曰天地
賦形外內環護中國之回字絕肖之內典圖
身心形合內外包藏亦回字之象天之所麗
日星人之所具五官水山之迂迴溪田之盤
獲以及花實函苞皮核層裏至于凡所以成
造化而證功果者莫不與回字相似故說曰
塵世乃生人之客寓幻途非久處之鄉蓋心
懷常住不忘本原身雖住世心實回焉及功

成行滿復命歸真名雖注世身亦回焉不特
此也無極包羅衆妙純清無染是爲萬靈至
大之綱太極包羅衆象理氣兼該是爲萬形
至大之綱清真正人遵真主之明命履至聖
之真傳則身回太極之清性回無極之妙成
全正果克登天闕此又全用返轉之義由數
說觀之回字取象則統天括地取義則返本
還原身心之關合理象之包藏一回字盡之
回之爲義大矣此先正不避回字之名而復

叠用回字之意也以是知穆民穆士乃吾人之本稱回回乃吾人居中國之稱稱此稱彼無可無不可也第名正而後言順吾人須自識其本稱而不得以中國之稱爲不美而避諱之也中國之士亦不得滯于一義以此稱爲不美而輕視之也○今

聖主重回人明祖重回學元代重回才宋世重回文唐帝重回教以天子之尊聖王之知不鄙其人歷代之名公鉅卿多爲文譏揚挖其美

則下此者可勿論已

金陵劉智識

乾隆四十三年歲在戊戌仲夏石城後學袁國
祚景初氏較字

天方至聖實錄卷之二十終

以系事

御覽至聖實錄後跋

書云太上貴立德其次立功其次立言竊取而思之其意似有等差其實相為終始蓋德非功不著非言

不傳而言正所以明德也
天挺之聖自具生知而後
起之則賢賴言取法吾教
至聖心原行事全體大用
實著於年譜一書而性學

即今寄于性理真境昭微
等秩所賴以傳者不在是
哉其所執之道所敷之教
莫非自其身體心至力行
而出之者不在是哉所謂

以身教者也無如文字本
西來中原莫能通曉吾等
幸逢

聖

明數十餘世子孫相沿日
侵月異夫分派衍而岐之

中又有岐焉恐將來對
天經而莫辯者素二凜
具經至聖之教典承祖父之
訓飭兢兢業業日以闡明
聖教為念引迪來茲是以

得劉子緒譯諸書而刊刻
之以行四方俾吾人雜處
各省者咸得盡識本來垂
之永久夫豈好為多事哉
亦惟上體

至聖之教而已矣雖身罹刑
獄脩歷險艱而無悔者乃
昭驗誠信真實而不惑也
所有遭阨各章奏亦贅梓
之以脩永無阨吾教者謹

跋

乾隆五十年歲在乙巳春正月望

日安分田民袁國祚景初氏

薰沐敬撰